



Uunga:
Karl Lyberth (S)
-MAANI

Kalaallit Nunaanni Naatsorsueqqissaartarfik pillugu § 37 naapertorlugu apeqquteqaammut akissuteqaat

Apeqqutinnut imaattumut qujanaq:

Naatsorsueqqissaartarfiup Grønlands Statistik-ip kisitsisit nalunaarutigisartagai akulikinnerusumik nutarterneqarsinnaannginnerlutik, soorlu suliffissaaleqisut pillugit?

Naamik. Suliffissaaleqisut pillugit kisitsisit Kalaallit Nunaanni Naatsorsueqqissaartarfimmi katersorneqarnissaat nalunaarsorneqarnissaallu nakkutiginnilluarnissaq siunertaralugu pingaaruteqarpoq. Kalaallit Nunaanni Naatsorsueqqissaartarfik paatsugassaangitsunik nassuiaasiortarnerup qulakkeerneqarnissaanut peqataasarpoq, taamaasillutillu suliffissaqanngitsut pillugit kisitsisit piffissap ingerlanerani kisitsisaatigineqartut illoqarfinnilu assigiinngitsuni suliffissaaleqisut pillugit kisitsisaatigineqartut imminnut assersuunneqarsinnaalersarput. Taamaattumik Kalaallit Nunaanni Naatsorsueqqissaartarfiup imaasiallaannaq kommuunini suliffissaaleqisut pillugit kisitsisit qaammammoortumik saqqummiussinnaanngilai, taakkua tassaasinnaammata kisitsisit suliffissaaleqisunik oqaluttu-artuunngitsut, allaffissornermulli atatillugu atugassat.

Kalaallit Nunaanni Naatsorsueqqissaartarfik suliffissaaleqisut pillugit naatsorsueqqissaarneq pitsanngorsarniarlugu suliffissaqarniarneq pillugu naatsorsueqqissaarnerit allat ingerlaavartumik pitsanngorsarniartarpai. Taamaattorli suliffissaaleqisut qaammatit taamaasa kisitsinngorlugit saqqummersittalernissaat pilersaarutigineqanngilaq.

2011-mi suliffissaaleqisunik naatsorsueqqissaartarnermut nunaqarfinni suliffissaaleqisut inuillu Kalaallit Nunaanni inunngorsimannngitsut naatsorsuineri ilanngunneqartalissaput. Tassunga ilutigitillugu Kalaallit Nunaanni Naatsorsueqqissaartarfik Inuusutissarsiornermut Sulisoqarnermullu Naalakkersuisoqarfillu suleqatigiillutik suliffissarsiuussisarfinnik oqaloqateqarnerunissartik pilersaarutigaat. Suliffissarsiuussisarfiit suliffissaaleqisut inunnut ikiorsiissutinik pisartagallit suliffissaaleqisutut nalunaarsorneqarnissaat qaqugukkut pisarnersoq pillugu maleruagassanik assigiiartunik atuinissaat qulakkeerneqassaaq.

Taassuma saniatigut Kalaallit Nunaanni Naatsorsueqqissaartarfiup qaammatit pingasukaarlugit kisitsisit sulisoqarnermut suliffeqarfillu akissarsisitsisartut amerlassusaannut tunngassuteqartut qaammatit pingasut taaneqareersut kingorna qaammatit marluk misaat qaangiukkaata saqqummersinneqartalernissaat sulissutigaa. Kalaallit Nunaanni Naatsorsueqqissaartarfiup suliffeqarfiit pisortanilu oqartussat isertitanut A-nut aningaasartuutinik qaammatikkaartumik nassinneqartalernerata kingunerisaanik taamatut naatsorsueqqissaartoqarsinnaalersimavoq.

Inussiarnersumik inuulluaqqusillunga

Palle Christiansen

2. marts 2011
Sagsnr. 2011-046003
Dok. Nr. 565407

Postboks 1037
3900 Nuuk
Tlf. (+299) 34 50 00
Fax (+299) 32 46 14
E-mail: oed@nanoq.gl
www.nanoq.gl